

Канон преподобным Антонию и Феодосию

Память празднуем 2 (15) сентября

Тропарь, глас 4-й

Звезды мысленные, просиявшия на тверди Церковней, иноков Российских основание, песньми, людие, почетем, радостныя похвалы сим воздающе, радуйтесь, преблаженнии отцы, Антоние со Феодосием Богомудрим, присно молящиися о последствующих и чущих память вашу.

Ин Тропарь, глас 3-й

Двоицу начальных Российских светил почтим, Антония, Богом посланного, и Феодосия, Богом дарованного: тии бо первии, равноангельным в России житием просиявше от гор Киевских, осветиша отечествия нашего вся концы, и путь к Небеси правый многим показаша, и, первоотцы иноком бывше, лики спасаемых Богови приведоша, и ныне, предстояще в вышних немерцаемому Божества Свету, молятся о душах наших.

Канон, глас 4-й

Песнь 1

Ирмос: Отверзу уста моя, и наполнятся Духа, и слово отрыгну Царице Матери, и явлюся, светло торжествуя, и воспою, радуяся Тоя чудеса.

Припев: Преподобни отцы наши Антоние и Феодосие, молите Бога о нас.

Яко грубословен и косноязычен, недоумея вам, преподобни отцы, хваление принести, молюся, дарствуйте молитву о мне: еже датися отсышше дару воспети память вашу, славна бо есть миру, и славно прославися.

Преподобни отцы наши Антоние и Феодосие, молите Бога о нас.

От младих ногтий в дар принесосте себе Богови, о преблаженнии отцы: тем же прием ваше благое предприятие, благодатию Духа наставил вы есть на путь правый.

Преподобни отцы наши Антоние и Феодосие, молите Бога о нас.

Заповедей спасенных послушавше, жизнь временную преобидесте, и Крест Господень на рамо вземше, мрачный мир непреткновенно преийдсте, небесным желанием водими.

Преподобни отцы наши Антоние и Феодосие, молите Бога о нас.

Отечество, родители, други и богатство, аки прелесть отвергше, Горний Иерусалим Бога же Отца, не стыдящагося вас братию нарицати, Христа, един бисер взыскати тесным путем изволисте, Антоние свободоимените, и Феодосие Богодорванне.

Преподобни отцы наши Антоние и Феодосие, молите Бога о нас.

Яко пустыннолюбныя горлицы гор Печерских достигше Богоноснии отцы, во подземная места вселистеся, и на твердом духовнаго желания основании гнездо свое положше, Богопеснивия породисте птенцы, иночествующих лики.

Слава: Слава Ти, слава, Троице Пресвятая, тихообразно подающая благодать в сердца верных, да скончаем хваления святых дела, и возвеселимся зело, честныя

други Твоя, Господи.

И ныне: Управи ум мой, Пречистая, во хвалении преподобных Твоих, да, не уклонся в неподобная сложивия пленится в работу лукавства: и буду радование чуждему.

Песнь 3

Ирмос: Твоя песнословцы, Богородице, Живый и Независтный Источниче, лик себе совокупльшия, духовно утверди, в Божественней Твоей славе венцев славы сподоби.

Преподобнии отцы наши Антоние и Феодосие, молите Бога о нас.

Яко елень возжаждав духовного питания, отче Антоние, от Печерских горы на Афонскую Гору скака пришед, обрете струя Ангеловидных отец жития, и сим поревновав от потока учения их испив и утвердися.

Преподобнии отцы наши Антоние и Феодосие, молите Бога о нас.

Втораго тя Моисея, Антоние, скрижали добродетелей на Печерскую гору принесшаго, слышав, Феодосии притек, глаголя: вчини мя в сих любовь, утверди мя в них, аки в Мирех, уязвен бо есмь любовию сопоставити Христоподражанному житию твоему.

Преподобнии отцы наши Антоние и Феодосие, молите Бога о нас.

Любовию и желанием ко Богу единоумне сопрягшеся, отцы преподобнии, на колесницу смирения, нищеты, терпения и чистоты вседосте, и превысоких достигосте святых селений.

Преподобнии отцы наши Антоние и Феодосие, молите Бога о нас.

Кто не удивится вашему житию, о преблаженнии отцы: кто не почудится ревности по Бозе, яко во плоти суще, Ангелом весьма уподобистесь, их же и сожители суще ныне, не забудите и нас, песнями вас ублажающих.

Слава: Непостижимая благость и действие Твое, во Троице Единый Боже: яко бренных воскрялиши горе, и от миродержавных нощи выспре ко свету возвышаши, приводиши и устрояши, Бог бо еси и твориши, елика хощеши.

И ныне: По величию Твоему, Пречистая, блажат Тя вси роди, и мы с ними блажим песнями, чутще Тя раболепным поклонением, и величаем.

Господи, помилуй (*трижды*).

Седален, глас 4-й

Небесное богатство и присносущную славу тщащеся восприяти, нищету и смирение, смирившагося Владыки восприясте, и миру себе распясте со похотами и страстями, тем блажаше память вашу, преподобнии отцы наши Антоние и Феодосие, молим, молите Христа Бога, даровать нам велию милость.

Слава, и ныне: Небесных и земных Царица сущи, не забуди нищих нас рабов Твоих, но яко Всемогущая, от Своих сокровищ подаждь милостию прощение грехом нашим: яко Человеколюбивая Человеколюбца Мати.

Песнь 4

Ирмос: Седяй в Славе на Престоле Божества во облаце легце, прииде Иисус Пребожественный Нетленною Дланию и спасе зовущия: слава, Христе, силе Твоей.

Преподобнии отцы наши Антоние и Феодосие, молите Бога о нас.

Самовластная ума, отче Антоние, оставль, под иго Владычне наклонился еси,

Ему же и доблестенный Феодосий припрягся, пленистеся в послушание Христово, и бысте добрии делателие, единонравны сердцем и духом.

Преподобни отцы наши Антоние и Феодосие, молите Бога о нас.

Не устрашиша вас в темных пещерах демонская страхования, доблемудрнии воины преподобни отцы, но падеся ратуяй вас под ногами вашими, низвержен оружием теплыя ко Богу молитвы.

Преподобни отцы наши Антоние и Феодосие, молите Бога о нас.

Твердое ваше и жестокое житие видев, Всеблагий Бог от темных мест просвети вас дарованием чудес, и славны сотвори миру, ихже недостоин бе мир, в горах и вертепах крывающихся толиких светил.

Преподобни отцы наши Антоние и Феодосие, молите Бога о нас.

Яко пресветлая светила постави вас Бог, преподобни отцы, на свещницы с под спуда, и просветисте жития добродетельми иночествующих лики, иже собрани добре пожиша вашим наставлением.

Слава: Царю царем Всемогущая Троице, брения немощию обложенным нам, рабом Твоим, дажь благодать, ясно пети память преподобных Твоих, в нихже удивил еси вся хотения Своя, Боже.

И ныне: Всесильная Владычице, нас, немощных, препояши силою на сопротивных: подая немощней плоти крепость: о Тебе бо и немощний крепкия враги побеждают, и победительная в песнех дароносят.

Песнь 5

Ирмос: Ужасошася всяческая о Божественней славе Твоей: Ты бо Неискусбречная Дево, имела еси во утробе над всеми Бога и родила еси Безлетнаго Сына, всем воспевающим Тя мир подавающая.

Преподобни отцы наши Антоние и Феодосие, молите Бога о нас.

Учением и творением бысте образ иночествующим, отцы треблаженнии, и вашим наставлением мнози успеха в заповеди Господни, и сих исполнением ко горнему шествию благий путь улучиша.

Преподобни отцы наши Антоние и Феодосие, молите Бога о нас.

Пророческим сподобльшеся даром, достохвальни отцы: ов бо огнь указательний на место с небеси упости сотвори, ов же скудную житницу молитвою муки исполни, от тех даров крупицами насыти души наши, молимся.

Преподобни отцы наши Антоние и Феодосие, молите Бога о нас.

Яко законодавцы постническим лицом предтекoste: ты, отче Антоние, скрижали деяния и видения силе предлагая, Богоданный же Феодосий, жезлом правления море страстей присек, предхождение тем показуя во Обетованную Землю.

Преподобни отцы наши Антоние и Феодосие, молите Бога о нас.

Упованием будущих благ себе вооруживше, и Креста меч в руках имуще, победисте мысленного Амалика, и наша враги сопособисте победити, яко предводителей наших, молим вы отцы преподобни.

Слава: Миродательная Троице Еиночестный Боже, мир огради, православныя люди, предстоящия в честном храме преподобных Твоих, храм себе сотворяя сердца, приносящих Ти песнь хваления.

И ныне: Мироположнице и скиние Пресвятая Бога Слова, нам слово дажь и мысль управи, во еже пети Тя, яко Благую Благому Родительнице.

Песнь 6

Ирмос: Божественное сие и всечестное совершающе празднество, Богомудрии, Богоматере, приидите руками восплемим, от Нея рождшагося Бога славим.

Преподобни отцы наши Антоние и Феодосие, молите Бога о нас.

Вышше естества человеческаго подвигшеся, преподобни: уподобистесь безплотных чином, тем же и почесть сих улучисте, сея Богодарованныя вам благодати и нас, чада ваша, не лишите ходатайством своим ко Богу, молимся.

Преподобни отцы наши Антоние и Феодосие, молите Бога о нас.

Вам, аки неусыпным стражем, Дева и Богомати ввери дом Свой, егоже пасосте, от волков мысленных стрегуще, и в нем собранного вами стада, о преблаженнии.

Преподобни отцы наши Антоние и Феодосие, молите Бога о нас.

Всегдашим яже ко Богу ума воскрилием, и воздеянием рук преподобни отцы ставше, Духу Пресвятому селение себе сотвористе, тем же вас аки дом Божий преукрашен хвалами украшаем.

Преподобни отцы наши Антоние и Феодосие, молите Бога о нас.

Сия еста преудобренная отцы, аки Херувими осеняющии дом Богоматере, и аки премудрыи вожди иноческому лицу, ихже не удалитесь заступати во всяких нуждах и скорбех.

Слава: Троице Пресвятая, желательное достояние давшая во скиниях святых Богоносным первоначальникам нашим, сих ради и нас того сподоби, в жизни сей сохраняющи от языческих нахождений.

И ныне: Тя Заупнику мира и Богоматерь всего живота моего, и спасение предлагаю, Ты бо Бога рождши спаси можеши поющия Тя, и в заступление крова Твоего прибегающих.

Господи, помилуй (*трижды*). Слава, и ныне:

Кондак, глас 8-й

Двоицу великих отец и правило иноков светлое, умныя зари онебесившии Российскую Церковь кто по достоянию хвалами воспоет, тии бо Престолу Божию предстоят: но яко имущии дерзновение к Святей Троице, Антоние преблаженне и Феодосие приснопамятне, молитесь о молебная к вам приносящих, и любовию песнями вас ублажающих.

Икос

В присносущнем Пресвятыя Троицы Божественном свете да восприимете селение, преподобни отцы, вся лета жизни сея в тесной пещере пожисте: тем же и преставльшеся от временных великим чудес дарованием от Господа сподобистесь, болезные исцеляти, беси от человек прогоняти, и без вреда обитель свою сохраняти, заступающе во скорбех, и молитися о молебная к вам приносящих, и песнями любовию вас ублажающих.

Песнь 7

Ирмос: Не послужиша твари Богомудрии паче Создавшаго, но огненное прещение мужески поправше, радовахуся, поюще: препетый отцев Господь и Бог, благословен еси.

Преподобни отцы наши Антоние и Феодосие, молите Бога о нас.

Благую жизнь зде поживше, блаженныя кончины сподобистесь, отцы святии, престависте бо ся от временных ко вечным, честною смертию, яже бывает честна преподобных Твоих, Господи Боже отец наших.

Преподобнии отцы наши Антоние и Феодосие, молите Бога о нас.

Равными труды ниву душ ваших возделавше, преподобнии, равная семена добродетелей поселясте, и по кончине равных воздаяний пожинаете радостотворныя рукояти поюще: Господи Боже отец наших.

Преподобнии отцы наши Антоние и Феодосие, молите Бога о нас.

На воде покойне при источнице вод пресладких, на ложах преподобных упокояющеся, преблаженнии отцы, от потока сладостнаго, поне каплею вашея благодати, чада ваша обдарствите поющия, в день памяти вашея.

Слава: Тройческое нераздельно, раздельне же Лицы, обаче Едино чтем Божество, Беззначальна Отца, Собезначальна Сына, и Преблагословленного от Отца исходящаго Духа.

И ныне: По Божественному существу Отцу Своему Единосущественный Бог Слово, от Девы единоестествен человеком явися, плоть прием из пречестных кровей, и Благословенную нарек Свою Матерь.

Песнь 8

Ирмос: Отроки благочестивыя в пещи Рождество Богородично спасло есть; тогда убо образуемое, ныне же действуемое, вселенную всю воздвигает пети Тебе: Господа пойте, дела, и превозносите Его во вся веки.

Преподобнии отцы наши Антоние и Феодосие, молите Бога о нас.

Гради и отечества своя яко же Авраам остависте, Вышняго Града со Авраамом жителие ныне, Богоноснии отцы, суще, оттуда посетите нас в день памяти вашея, и умолите, Христа с вами нам пети во веки.

Преподобнии отцы наши Антоние и Феодосие, молите Бога о нас.

Иже ваше торжество празднующим днесъ, о святии угодницы, молитеся избавитися всякаго вражия навета, от варварских нахождений, и на сопротивных возвышающе рог христиан православных, поющих Господа во веки.

Преподобнии отцы наши Антоние и Феодосие, молите Бога о нас.

Милостиво о нас простирайте руце свои ко Владыце, святии первоначальницы наши, и неотлучно назирайте стадо ваше, яко же обещаитесь, сохраняюще то от волков мысленных, сподобите же с вами пети Господа во веки.

Преподобнии отцы наши Антоние и Феодосие, молите Бога о нас.

Славити вашу память кто не восходит, той ни да улучит вечныя славы, нам же славящим умолите Господа, идже лики святых, идже собор преподобных со Ангели, песнями превозносим Господа во веки.

Слава: Яко на превознесенную возшедше гору, приидите, людие, станем во храме преподобных первоначальников Печерских, и прославим Троицу Пресвятую, яже нас собра во днешний день, прославити память святых Своих.

И ныне: Святую гору Божию и селение Вышняго мудрствующе Тя, Дево Чистая, зовем: слава Ти, матерем и девам Славо, и Похвало человеческаго рода.

Песнь 9

Ирмос: Всяк земнородный да взыграется, Духом просвещаемъ, да торжествует же Безплотных умов естество, почитающее священное торжество Богоматере, и да вопиет: радуйся, Всеблаженная, Богородице, Чистая Приснодево.

Преподобнии отцы наши Антоние и Феодосие, молите Бога о нас.

Иже верою приходящим ко храму вашему, святыи отцы, утешение подавайте во скорбех, сохраняюще сих различных озлоблений, яко да вас заступников наших присно величаем.

Преподобнии отцы наши Антоние и Феодосие, молите Бога о нас.

Аки десятострунная гусль, и велегласная труба, Печерская, вами согражденная Лавра проповедует вашу память, Антоние Богомудре и Феодосие достохвальне, созывающи люди на хвалу и почесть, ихже и мы величаем.

Преподобнии отцы наши Антоние и Феодосие, молите Бога о нас.

Принесенное в дар благодарственное наше пение, назрете, преподобнии отцы, и тихосмотрительним оком, иже грубогранесловное исправите приемлюще, не яко в дар: но яко во сердец наших к вам рачение, им же вас днесь величаем.

Преподобнии отцы наши Антоние и Феодосие, молите Бога о нас.

Владычней подобящеся благости, аки две лепте пение и делание сие от нас приемше треблаженнии отцы, испросите грехом оставление, в час же конечный представите нам, обнадеждующе упованием дойти, идеже святые Христа Царя величают.

Слава: Елико духовную благодать Пресвятаго Духа во грубий разум, толико воспети дерзнух память вашу, Антоние святе и Феодосие блаженне, сим навершающи: дающему молитву молящемуся, и пение хотящему, Богу Единому слава буди, буди.

И ныне: Хотением смотрения Своего вся сотворивый, Пречистая, из Тебе воплотивыйся Бог Истинный, и Человек Совершенный.